

Լ Բ Ա Ց Ո Ւ

## ՀԱՅԿԱԿԱՆ ՍՍՌ ԳԱ-Ի ՆԱԽԱԳԱՀՈՒԹՅԱՆ ՈՐՈՇՈՒՄԸ ՀԱՅԿԱԿԱՆ ՍՍՌ ԳԱ-Ի «ՏԵՂԵԿԱԳՐԻ» ԱՇԽԱՏԱՆՔՆԵՐԻ ՄԱՍԻՆ

Հայկական ՍՍՌ ԳԱ-ի նախագահությունը իր 1951 թ. օգոստոսի 15-ի նիստում քննության առավ «Հայկական ՍՍՌ ԳԱ-ի Տեղեկագրի» (Հասարակական գիտություններ) վերաբերյալ «Կոմունիստ» թերթի 1951 թ. հուլիսի 22-ի համարում հրատարակված հոդվածը:

Նախագահությունը նշեց, որ «Կոմունիստ» թերթի 1951 թ. հուլիսի 22-ի համարում տպագրված «Սովետական գրականության կենսական խնդիրներից հեռու» հոդվածը ճիշտ է արժանագրում «Տեղեկագրի» աշխատանքներում գոյություն ունեցող թերությունները: «Տեղեկագրի» քիչ ուշադրություն է նվիրում սովետական գրականության հարցերին: Վերջին մեկ և կես տարվա ընթացքում «Տեղեկագրում» տպագրվել է միայն մի քանի հոդված՝ նվիրված «սովետահայ գրողների ստեղծագործությանը»: Տպագրված այդ հոդվածների զգալի մասը (Հ. Մուրադյան — «Գուրգին Բորյան», Ռ. Նանումյան — «Թաթուլ Հուրյան», Գ. Գրիգորյան — «Մաղաթ Պետրոսյան») աչքի չեն ընկնում գիտական բարձր մակարդակով, չեն պարունակում խորրդ տեսական ընդհանրացումներ և գերազանցապես կրում են նկարագրական բնույթ:

Նախագահությունը սխալ համարեց այդ հոդվածների հրապարակումը «Տեղեկագրում»՝ առանց խմբագրական լուրջ մշակման, միաժամանակ արժանագրեց, որ Գրականության ինստիտուտի ղեկավարությունը սխալ է վարվել տեսականորեն թույլ հոդվածները հանձնարարելով տպագրության:

«Տեղեկագրի» էջերում՝ սովետահայ գրականության մասին տպագրված հոդվածների քանակը և նրանց ցածր մակարդակը վկայում է այն մասին, որ Մ. Արեղյանի անվան Գրականության ինստիտուտի սովետական գրականության սեկտորը դեռևս անբավարար է աշխատում, համալրված չէ անհրաժեշտ թվով բարձրորակ գիտական աշխատողներով: Ինստիտուտի դիրեկցիան և սեկտորի ղեկավարությունը պահանջկոտ վերաբերմունք չեն ցուցաբերում աշխատակիցների գրական արտադրանքի որակի նկատմամբ:

Գիտությունների ակադեմիայի նախագահությունը նշեց մի շարք կոնկրետ միջոցառումներ՝ գոյություն ունեցող թերությունները վերացնելու համար:

Նախագահությունը առաջարկեց «Տեղեկագրի» խմբագրությանը՝ ավելի մեծ ուշադրություն դարձնել սովետական գրականության խնդիրներին, սխտեմատիկաբար հրատարակել այնպիսի հոդվածներ, որոնք մարքս-լենինյան մեթոդոլոգիայի դիրքերից առաջ քաշեն և լուծեն սովետահայ գրականության վերելքի հետ կապված ակտուալ հարցերը:

Խմբագրությունը պետք է խստապահանջ լինի տպագրվող հոդվածների որակի նկատմամբ, կատարի խստագույն ընտրություն, մերժելով այն հոդվածները, որոնք չունեն տեսական բարձր մակարդակ, չարադրված չեն լավ լեզվով:

Նախագահությունը Գրականության ինստիտուտի ղեկավարության ուշադրությունը հրավիրեց այն հանգամանքի վրա, որ պետք է սովետական գրականության սեկտորն ուժեղացնել բարձրորակ աշխատակիցներով, խնամքով քննել տպագրության համար հանձնարարվող աշխատությունները, այս գործում բացառելով նեխած լիբերալիզմի, անսկզբունք բարեկամական հարաբերությունների ամեն մի դրսևորման հնարավորությունը:

Նախագահությունը առաջարկեց Հայկական ՍՍՌ ԳԱ-ի Հասարակական գիտությունների բաժանմունքի բոլոր գիտահետազոտական հիմնարկների ղեկավարներին՝ ուժեղացնել խմբագրական-հրատարակչական խորհուրդների աշխատանքը, կտրականապես հրաժարվելով «Տեղեկագրի» խմբագրությանը թույլ, լրիվ չմշակված հոդվածներ ուղարկելուց, մերժելով այն անթույլատրելի պրակտիկան, երբ «Տեղեկագրում» հրատարակվելու համար ուղարկվող հոդվածներին անսկզբունք նկատառումներով տրվում է երկիմաստ, ոչ օրեկտիվ, այս կամ այն հեղինակին «շվիրավորելու» ցանկությամբ թելադրված կարծիքներ: